

Naalakkersuisuugallartut sulineranni najoqqutassat

Atuuffia

1. Naalakkersuisut nutaat Inatsisartunit qinerneqarnissaasa tungaannut matumani najoqqutassat Naalakkersuisuugallartunut, tak. imm. 2, atuupput.

Naalakkersuisunik atuukkunnaarsitsineq il.il.

2. Inatsisartut Naalakkersuisullu pillugit Inatsisartut inatsisaanni kapitali 6 naapertorlugu Naalakkersuisuugallartut Naalakkersuisuugallartutut isigineqartarput piffissamit ima pisoqaraangat:
- Inatsisartunut nutaamik qinersinissaq nalunaarutigineqarpat,
 - Naalakkersuisut soraarnissaq qinnutigippassuk imaluunniit
 - Naalakkersuisut tamarmiusut Inatsisartunit atuukkunnaarsinneqarpata.

Naalakkersuisuugallartut sulinerat

3. Naalakkersuisuugallartut atorfimmi suliaassat ingerlaannarnissaannut pisariaqartunik taamaallaat suliaqarsinnaapput. Atorfimmi suliaassat ingerlanneqarnissaat atorfilittanit isumagineqassasut naatsorsuutigineqarmat, Naalakkersuisuugallartuq suliat ataasiakkaat suliarineqarnerini peqataaneq ajorpoq.

4. Naalakkersuisut polikkikkut aalajangiinnaanngillat, soorluttaaq suliani annertuuni allaffissornikkut aalajangiisoqarsinnaanngitsaq.

5. Atorfimmi suliaassat ingerlanneqarnissaat qulakkeerumallugu, Naalakkersuisut pisinnaatitsissutit aningaasaliissutillu atuuttut tunngavigalugit allaffissornermi suliatik ingerlatiinnassavaat.

Angalanerni peqataaneq

6. Pisuni kinguartinneqarsinnaanngitsuni nunap soqutigisai sinniisuuffigineqarnissaat pineqanngippat, Naalakkersuisut angalaqqusaanngillat.

7. Ataatsimiinnissaq suliarluunniit politikkikkut peqataaffigineqartariaqanngippat, atorfilittat ataatsimeeqataassapput, taamaattoq tak. imm. 4.

Ataatsimiinnerni peqataaneq

8. Naalagaaffimmi oqartussanik, nunanik allanikkiisalu maani nunami aamma nunanit tamalaani il.il. kattuffinni ataatsimiinnerni peqataanissat tunuarsimaarfigineqassapput.

9. Ataatsimiinnissaq suliarluunniit politikkikkut peqataaffigineqartariaqanngippat, atorfilittat angalaqataassapput, taamaattoq tak. imm. 4.

Suliniutitik aallarteriikkanik suliaqaannarneq

10. Naalakkersuisut suliniutitik aallarteriikkanik sulinertik teknikikkut ingerlatiinnassavaat, matumani suleqatit nr. 8-mi taaneqartut peqatigalugit suliniutit aallartereersut ilanngullugit.

Tusagassiorfinnut aamma tusagassiorfinnit saaffiginnissutit

11. Tusagassiorfinnit saaffiginnissutit pissutsinik piviusunik taamaallaat imaqartillugit akineqarssapput.

12. Tusagassiorfinnut nalunaarutit naalakkersuisoqarfinni pisortanit taamaallaat nassiunneqaqqusaapput, politikkimullu tunngasunik imaqaqqusaanatik.

Atorfnitsitsineq soraarsitsinerlu

13. Allaffissornermi qulliunerusumi atorfinni Naalakkersuisut atorfnitsitsisinnaanngillat imaluunniit soraarsitsisinnaanngillat imaluunniit ataatsimiititalianik aamma ataatsimiititalarsuarnik il.il. pilersitsisinnaanngillat.

§ 37 naapertorlugu apeqqutit

14. Inatsisartut suleriaasianni § 37 naapertorlugu Inatsisartunut ilaasortanit apeqquteqaatit akineqassanngillat.

15. § 37 naapertorlugu apeqquteqaateqartoq naalakkersuisoqarffimmit akisussaasumit ilisimatinneqassaaq apeqqutigineqartoq akineqassanngitsoq, akissuteqassagaanni atorffimmi suliassat ingerlanneqarnissaat pisariaqartut avataaniissammat.

Suliffeqarfiup avataanut allaffigeqatigiinneq

16. Suliamik suliaqarnermut atatillugu innuttaasunik, suliffeqarfinnik il.il. allaffigeqatigiinneq nalinginnaasumik akineqassapput.

17. Soqutigisaqatigiiffinnut il.il. allaffigeqatigiinnerit aallaavittut paasissutissanik piviusunik taamaallaat imaqqassapput.

Tamanut tusarniaaneri

18. Inatsisartut inatsisissaattut, nalunaarutissaattullu siunnersuutit, nassuiaatit il.il. nutaat tamanut tusarniutigineqqusaanngillat.

19. Tusarniutitut nassiuqqareersut tusarniaanermi piffissarititaasut naapertorlugit suliaralugit naammassineqqassapput, tusarniulli pillugu suliffeqarfiup iluani allakkiortoqareertillugu suliarinninneq unitsikkallarneqqassalluni.

20. Inatsilerinermut immikkoortortaqqarfiup inatsisiliornermi pitsaassutisimik qulakkeerinninniarnera nalinginnaasumik ingerlanneqqassaaq, siunnersuutilli akuerisassanngortinneqqassanngillat.

21. Kommunini ileqqoreqqusaattut siunnersuutit kommunalbestyrelsimit akueritikkusutat, kommunimi ileqqoreqqusanut malittarisassat atuuttut naapertorlugit naalakkersuisoqarfimmi susassaqartumi nalinginnaasumik misissuiffigineqqassapput.

Nalorninermi apequtit

22. Pisuni aalajangersimasuni malittarisassat qanoq atorneqqarnissaannik nalornissuteqarnermi, suliaq Naalakkersuisut Siulittaasuata Naalakkersuisoqarfianit naliligassanngorlugu saqqummiunneqqarsinnaavoq.

23. Nalornineq Naalakkersuisut Siulittaasuata Naalakkersuisoqarfianut saqqummiunneqqarpat ajornartorsiutaasoq, matumani nalornissuteqarnermi patsisaasoq ilanngullugu kiisalu naalakkersuisoqarfiup aaqqiissutissatut siunnersuutaa saqqummiussami ilaatinneqqassapput.

Atuutsilersitsineq

24. Inatsisartunut nutaamik qinersinissaq nalunaarutigineqqarpat najoqqutassat ukua erngertumik atuutilissapput, Naalakkersuisuugallartut sulinerat pillugu siornatigut najoqqutaasut tamaasa, matumani Naalakkersuisuugallartut sulinerat pillugu najoqqutassat 18. februar 2021-meersut ilanngullugit taarsissavai..

Naalakkersuisut Siulittaasuata Naalakkersuisoqarfia, ulloq 5. decembari 2024

Hans-Peder Barlach Christensen
Naalakkersuisoqarfimmi pisortaq

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut